



UNIVERSITÄTS-
BIBLIOTHEK
PADERBORN

Universitätsbibliothek Paderborn

**Indictio, Acta & Decreta Synodi Diœcesanæ
Paderbornensis**

Diözese <Paderborn>

Nevhvsii, [1688]

Partis Tertiæ.

urn:nbn:de:hbz:466:1-36013



P A R S T E R T I A.

De

*STATV CLERICORVM ET DE IIS, QVAE HIS
ANNECTVRN TVR.*

T I T U L U S I.

De Prælatis, Dignitatibus, Archidiaconis et Canonicis Cathedralis et Collegiatarum Ecclesiastarum.

I.

Ecclesiasticæ disciplinæ retinendæ & conservandæ causâ Ecclesiistarum Dignitates sunt constitutæ, quibus etiam pro merito laborum & amplioris curæ majora stipendia sunt assignata, quæ recte usurpabunt, si labore, Ministerio atque industriâ respondeant ac divinum cultum promovere, Ecclesiasticam disciplinam conservare, ac Nos operâ & officio juvare studeant.

2. Præpositi tanquam præcipui Ecclesiistarum Prælati illud diligenter curent, ut res, bona, jura, & Privilegia Ecclesiistarum suarum defendant, ab omni injuria, damno & molestia vindicent ac conservent, eaque provideant ac procurent, quæ ad Ecclesiistarum (à quibus dignitates & majora stipendia percipiunt) defensionem, pacem & tranquillitatem spectant.

3. Decani ob annexam eorum officio curam animarum à Nobis Confirmationem imprimere tenebuntur, cumq; ipsis singulariter ex officio illa commendata esse debeant, quæ circè Ministeria Ecclesiæ & Ecclesiasticarum personarum vitam, Chori ac Capituli disciplinam, excessus, ac correctionem desiderant, hinc meritò ab illis requirimus, ut omnia quæ ad honestatem & vitam bonam omnium Canonicorum, Vicariorum, Clericorum ac Ministerialium Ecclesiæ suæ pertinent, diligenter ab omnibus observari curent.

4. Qui præter Decanos, dignitates & officia in Cathedrali & Collegiatis Ecclesijs obtinent, diligenter curent ut suis officijs secundum Canones & cujusque Ecclesiæ laudabiles consuetudines satisfaciant.

5. Archidiaconi cum functionibus & officio nobis conjuncti ac in partem sollicitudinis nostræ Episcopalis vocati, adeoque à Canonibus oculi Episcopi, ejusque Vicarij aliquando videntur, quod Episcopi Ministri sint, & ea omnia quæ exercent ad Episcopum pertineant; hinc illos in Domino monemus, ut strenue Nos adjuvent recteque suo officio fungantur, prout Tridentinum *Seff. 24.* de Reformatione c. 3. illis præscribit.

6. Si quæ præbendæ Canonicales certum habeant annexum Ordinem, illud Possessores curare debent, ut Ordinem illum suscipiant & oneri annexo satisfaciant, neque onus in alios rejiciant, nisi approbatis fundationibus aliter sit constitutum.

P

T I T U L U S

TITULUS II.

De Pastoribus Vicepastoribus et Sacellaniis.

I.

EX sacra Scriptura discimus à cura vel incuria Pastorum & Vicepastorum scèpè subditorum pendere salutem vel damnationem; idcirco maximopere providendum est, ut in oculis Dei & re ipsa hoc esse inveniantur, quod humano dicuntur ore, omnesq; quotquot in hac nostra Dicēcē tam ruri quam in Urbibus hisce nominibus censentur, verè digni sint atq; idonei, quibus cura salutis animarum tutò credatur, & si forma facti gregis non ex composito vel ad solam speciem externam, sed ex animo eundem non minus honestæ probæque vitæ exemplo, quamoblatō Sacrificio pabuloque sanæ doctrinæ & Sacramentorum pascant & in viam salutis æternæ dirigant.

2. Vacantibus igitur Ecclesijs Parochialibus volumus, ut, quam fieri potest citissimè, de idoneis in concursu approbatis Pastoribus provideatur, illiq;, mox instituantur, cumq; ex dilata vel suspensi Parochialis Ecclesiæ collatione, provisione seu præsentatione & institutione salus populi pericliterur, quæcumque in Concilijs Tridentini decretis & PII V, Constitutionibus statuta, decreta & ordinata sunt, observari volumus, declarantes, omnes & singulos quibus jus conferendi, providendi, præsentandi, & instituendi competit, ad collationem, provisionem, præsentationem, & institutionem intra tempus ibidem præfixum faciendam teneri, & obligatos esse.

3. Cùm non solum Pastoribus sed etiam eorum Sacellaniis alijsq; in Pastorali munere adjutoribus ob populi frequentiam vel Parochiæ latitudinem vel aliam legitimam causam in subsidium ad functiones Pastorales exercendas assumptis cura animarum incumbat, nullus Pastorum Civitatis seu Dicēcēsis nostræ cujusquam Sacellani, vel adjutoris operâ in Pastorali suâ functione vel ad Confessiones Sacramentales, brevissimo etiam tempore excipendas utatur, qui præter testimoniales legitimæ Ordinationis suæ litteras scripto non docuerit, se sufficienti Examine pro tanto munere ritè obeundo repertum fuisse idoneum.

4. Curati & Vicecurati, omnesque alij quibus animarum cura commissa est, non possunt neque debent oves suas etiam metu periculi vel pestis deserere, vel aliorum negotiorum causâ alio discedere, nisi Christiana charitas, urgens necessitas, debita obedientia aut evidens Ecclesiæ utilitas eos abesse postulaverit.

5. Quod si justâ de causa abesse debeant à sua Parochia, ultrà tres quatuorve dies feriatis non absint, quod tempus si prorogandum sit, ab Archidiacono licentiam flagitent, quam illi non nisi ad duas vel tres hebdomadas extendant, diurniorem verò à Nobis nostrove in spirituallibus Vicario Generali postulare & scripto obtinere teneantur, ac tūm quidem & quandocunq; & quamdiu ipsos abesse contigerit, alteri Sacerdoti Auctoritate nostrâ ad hoc approbato curam ovium suarum cum debita mercedis & fructuum portionis assignatione fideliter committant, idq; sub pœnis privationis omnium fructuum & emolumentorum alijsque gravioribus, tam ex Tridentini Concilijs præscripto quam arbitrio nostro infligendis.

6. Volumus insuper, ut Curatis & Vicecuratis juxta ejusdem Conciliij decretum singulis annis ultrà bimestre sive continuum sive interruptum abesse non indulgeatur, neque Diebus solemnioribus Nativitatis & Resurrectionis Dominicæ, Pentecostes, Corporis Christi, Dedicacionis & Patronorum Ecclesiæ: Dominicis item Adventus & Quadragesimæ, quando maximè oves refici & Pastoris prælentiâ in Domino gaudere debent, concedatur.

7. Si quis verò ultrà bimestre abfuerit, noverit se peccati reatum incuruisse & pro ratâ temporis absentia fructus non facere suos, nec tutâ conscientiâ (aliâ etiam declaratione non secutâ) posse retinere, sed frabricæ Ecclesiæ aut pauperibus loci erogare teneri, nisi ex gravi causâ per nos cognitâ & probatâ diutius emanendi licentiam in scripto sese obtinuisse ostendat.

8. Eodem decreto Sacellanos, qui Pastores in suis functionibus adjuvant, comprehendunt, eosq; nec ad unum diem, nisi Pastore præmonito & consentiente, abesse volumus.

9. Pastor seu Vicepastor seu quivis alias Sacerdos Auctoritate nostrâ approbatus peste, vel alio contagioso morbo laborantium Confessiones auditurus, ante omnia (si fieri possit) provideat, ut in loco patenti & aëre non infecto sit constitutus, adeoq; infirmi si absq; gravi eorundem incommmodo fieri queat, vel cubiculum aut domum ad confitendum egrediantur, vel saltem ad fenestrā

nestram Parocho foris exspectante sese deferri procurent; proderit etiam pestis tempore pro Concione monere fideles, ut qui sani sunt, ad sacram Confessionem in Ecclesia peragendam matutinè accedant.

10. Sciant etiam Pastores, Curati & Rectores Ecclesiarum cùm ipsi Ecclesiæ aut populi Dei curam habere debeant, primùm domui suæ benè præfesse studeant, ut nihil in ea sit, quod non pietatem, Dei zelum, frugalitatem & omnem honestatem sapiat.

11. Deinde frequenter domos Parochiæ suæ obeant, ac perlustrent, ægrotos invisant, pauperum, viduarum & pupillorum & aliarum miserabilium personarum curam in se suscipiant, iras & inimicitias suorum Parochianorum componant, publica blasphemia, adulterij, concubinatus, fornicationis, usurarum & similia scandalosa crimina, quæ ad cognitionem & correctionem Ecclesiæ pertinent, seriā graviq[ue] commonitione atque interpolatione corrigere studeant, & ubi monitione suâ non profecerint, Nos & Officiales nostros ad coercendos & puniendos pertinaces implorent.

12. Conciones statis festis ac Dominicis diebus diligenter habeant, festos dies & Jejunia & quæ alijs publicè denuncianda sunt, populo diligenter post Concionem significant.

13. Missas frequenter ac devotè celebrent habitâ præcipuâ ratione fundationum & piarum consuetudinum, populumque moneant, ut ijs religiosè intersit.

14. Funebria justa piè ac fideliter persolvant, & si quæ in convivijs funebribus superfluè ac immodicè fieri haec tenus animadvertant, illa tollere studeant aut denuncient.

15. Ecclesiam & quæ ad ejus cultum & nitorem pertinent, diligenter curent, & si quid reparandum aut sarcendum, illud tempestivè provideant.

16. Reliquias Sanctorum, vestes sacras, libros, calices, patenas, corporalia & reliqua ejus generis Ecclesiastica Instrumenta & Ornamenta ad Altaris Ministerium pertinentia sollicitè procurent, obseruent, & custodian.

17. Animia Laicorum familiaritate caveant, magis verò à convivijs, tabernis, compotationibus & à fôrdibus ac avaritiæ notâ, quæ vilipendium generant.

18. Pastores quoque ab omnibus ad suas Parochias commigrantibus super vita & fide illorum litteras testimoniales ultimi ipsorum Pastoris requirant.

19. Pastores & Vicepastores aut eorum Vicarij sumnum Sacrum Dominicis & festis diebus in Ecclesia decantandum populi tûm spirituali tûm corporali saluti potissimum applicent, quos etiam singulis vel alternis, non festis diebus pro sua sibi commissorum salute divinum Missæ sacrificium immolare, atque ad hoc ab Archidiaconis excitari optamus, ut indies sibi concreditoq[ue]; gregi in spiritualibus & temporalibus favorem cœlestem cumulent auctiorem.

20. Fraterna postulat charitas ut quos in vita laborum habuimus socios, & participes post mortem Christianæ pietatis officio prosequamur, idcirco omnes Pastores & Vicepastores horramur, ut mortuis suis Confratribus, Pastoribus seu Vicepastoribus, quamprimum ipsis de obitu constiterit, sanctissimo Missæ sacrificio animabus eorundem subveniant.

21. Dolenter intelleximus nonnullos Ecclesiasticos & Pastores adeo sui subinde esse oblitos, ut veste etiam Clericali exutâ per agros discurrere, currus simo operare, vehere, agriculturam exercere, alijsq[ue] servilibus operibus avaritiæ aut quæstus gratiâ vacare, quin & intrâ domesticos parientes tam vilater se gerere non erubescant, ut laicaribus & alijs sint offendiculo: Quibus præcipimus ut gravitatis, quæ Sacerdotes decet, memores, ab his omnibus sub poena suspensionis ab officio & beneficio, aliaq[ue] graviori poenâ arbitrariâ sibi temperent, non tamen prohibere intendimus, quo minus debito tempore & loco honestâ corporis exercitatione otium devident.

22. Sacerdotes, maximè, quibus animarum cura incumbit, memores Sacrorum Canonum ad aleas & taxillos non ludant, nec hujusmodi aut alijs vetitis ludis intersint, sed tempus illud colloquio potius & lectione sacrorum librorum & historiarum transfigant.

23. Deniq[ue] cùm multa quæ in varijs Titulis hujus nostræ Synodi, de Officio divino, administratione Sacramentorum, matrimonialibus denunciationibus, ornatu & curâ templorum, de peregrinis vagis & ignotis Clericis ad celebrationem & administrationem Sacramentorum sine nostra vel Vicarij nostri licentiâ non admittendis, sicut etiam de libris baptismali, matrimoniali & descriptorio familiarum & similibus, hinc inde constituta sunt & definita, Parochos eorumq[ue], curam & officium concernunt, volumus & seriò ijs præcipimus, ut ea omnia ipsimet integrè præsent & observari faciant & procurent.

T I T U

TITULUS III.

De vita et honestate Clericorum.

I.

Nihil ferè est, quod hoc sœculo tam sit exceptandum, quām ut iij, qui in sortem Dei vocati divina munera dispensant, ac ministerijs Ecclesiasticis præficiuntur, vitâ & exemplo id præstent, quod professione, statu ac vocatione suâ promittunt, ut, qui in eos tanquam in speculum oculos suos conjiciunt, Laici invenire possint quod dignè imitentur. Hoc enim omnibus ferè sœculis compertum fuit, pro Sacerdotum vitâ benedictionem aut maledictionem à Deo in populum procedere, nec quicquam gravius Ecclesiæ aut Republicæ accidere, aut illam vehementius affligere, quām si à Clericis Laici bonæ vitæ incitamenta & exempla petere non possint, quod gravissimè olim deploravit S. Gregorius & nos ipsius verbis repetimus: Nullum puto fratres charissimi ab alijs majus Præjudicium, quām à Sacerdotibus tolerat Deus, quando eos, quos ad aliorum correctionem potuit, dare de se exempla pravitatis cernit: Quando ipsi peccamus qui componscere peccata debuimus, nulla animarum lucra quaerimus, ad nostra quotidie studia vacamus, terrena concupiscimus, humanam gloriam intentâ mente captamus & quia eo ipso quo cœteris Prælati sumus, ad agenda quælibet majorem licentiam habemus, suscepimus benedictionis ministerium vertimus ad ambitionis augmentum, Dei causas relinquimus, ad terrena negotia vacamus, locum sanctitatis accipimus, & terrenis actibus implicamur.

2. Hinc Nos serio ac sub obtestatione divini Judicij monemus omnes & singulos, ut quod sunt in Ecclesia Dei digniore loco & Ordine, eò vitam gerant inculpiorem, statumque suum vitæ innocentiam ac morum gravitate diligenter exornent.

3. Cùm verò summa disciplinæ Christianæ in eo consistat, ut abnegantes impietatem & sœcularia desideria sobriè, piè, justè, vivamus in hoc sœculo, idq; ad omnes universim Christianos pertineat, intelligunt facile Ecclesiastici, qui cœteris in exemplum positi sunt, quid adipos speceret, quā illos morum gravitate in sermone, gestu, incessu, quā in cultu & vestitu corporis moderatione & decentiâ, quā vita sanctioris innocentiam illos cœteris præstare oporteat. De quibus cum multa sparsim per sacros Canones, Concilium Tridentinum, Statuta Provincialia & Constitutiones Synodales tradita sint nos breviter hoc loco quædam repetenda duximus.

4. Omnes Clerici, potissimum qui Ecclesiastico funguntur Ministerio, aut Ecclesiæ bonis sustentantur, ut verè Clerici sint & peculiari quâdam ratione Dominum possidere & à Domino possessi videantur, terrenis cupiditatibus & voluptatibus non indulgeant. Hujus eos admonet Clericalis tonsura, Regale Decus Christi Regis nostri nostræque militiæ insigne, idcirco omnes & singuli Ordini & gradu suo convenientem gerant coronam, eamque scipi faciant renovari habitumque honestum statui suo congruentem gestent.

5. Veste omnes utantur honestâ ac decente, ut in materia, formâ, colore, pretio ac omni modo respondeat tûm modestiæ ac dignitati Clericali tûm conditioni ac statui singulorum, in quo uti vanitatem & affectatam mundi curiositatem, novas levitates ac nitorem, sic abjectionem & nimias sordes exclusas volumus. In omni vestitu præsertim externo color tantum niger adhibeatur.

6. Clerici sacris iniciati aut beneficiati, omnino abstineant ab omni venatione clamofâ, nec armati, nisi ob itinerum pericula incedant, coram Judice sœculari, Advocati, Procuratoris, Notarij seu Tabellionis Officio non fungantur, nec causas præter proprias vel Ecclesiæ suæ agant, nisi necessitas propinquarum vel miserabilium personarum eorundem patrocinium exigat, artem quoq; Ghirurgicam vel medicam non exerceant, neq; profana Officia, nisi in casibus à jure permisis. Judicio Sanguinis aut Executioni sententiæ Capitalis, nisi Officij Spiritualis causâ, non intersint.

7. Familiam honestam alant, non infames, non suspectas aliâve turpi notâ laborantes personas domi suæ detineant. Intempestiva convivia, longiores accusationes, ad æquales haustus provocationes, pomeridiana Symposia & consortium quorumvis intemperantium & male motorum studiose declinent, concessisque sibi à Deo donis sobriè & frugaliter utantur.

8. Si

8. Cauponas Ecclesiastici maximè verò beneficia curata obtinentes seu tabernas portatorias sub quounque prætextu, nisi in itinere constituti, aut id ipsum cura animarum exigat, non ingrediantur ac frequentent.

9. Si quando sacratum primitiarum occasione aut aliâ honestâ ex causa Sacerdotes allijve è Clero convivia instituant, diligentem statut vocacionisque suæ rationem: Sit mensa frugalis & brevis sanctis ac modestis condita Colloquijs, à temulentiâ & turpitudine verborum gestuumque quām alienissima, ludicra nulla, nullæ saltationes, Choræ, aut aliæ Clericalem statum dedecentes levitates admisceantur, multò minus ipsi Clerici choreas ducant & saltent, meminerintque ejus, quod S. Hieronym. de vita Clericorum scripsit: Facile contemnitur Clericus qui sc̄pē vocatus ad prandium non recusat, nunquam perentes raro accipiamus rogati.

10. Pastores & Clerici ad signum loco publico præsertim Dominicis aut fori festis diebus non jaculentur, pilâ palmariâ non ludant, aut alio lusu inter vulgus se exerceant, recordentur potius finis seu instituti sui, & sciant se non ad ignaviam, desidiam aut otium, sed ad salutares Ecclesiasticæ militiae labores vocatos esse, quapropter tempus quod Officijs divinis obeundis, frequentandis Ecclesiis & corporis necessitatibus non impeditur, vanis & inutilibus miscendis colloquijs & profanis actionibus non terant, sed divinatum literarum studijs & cœlestium rerum contemplationibus, frequentiisque Concilij Tridentini, Synodaliumque Decretorum lectione ac sanctis p̄ijsque Officijs traducant.

11. Cūm Sacerdotum dignitas non parūm vilescat, quod à Nobilibus alijsve Laicis ad servitia sacerdotalia se applicari permittant, ideo ipsi sub pœna suspensionis à divinis prohibemus, ne similibus negotijs servilibus vel officijs sacerdotalibus vacent, quæ impediunt quo minus Deo militent, cui se milites probârunt & addixerunt.

12. Apostoli sententia est: Nemo militans Deo implicit se negotijs sacerdotalibus, ut ei placet cui se probavit. Quarè nullus è Clero ullam mercaturam, negotiationem sacerdotalem, turpem quæstum, aut indignum statui labore exerceat, neque decimas, census, prædia vel agros alienos ob quæstum colendos conducat & accipiat.

13. Quod si Clerus coram Judice Laico testimonium dicturus sit, vel quocunque Juramentum præstiturus (quod etiam sine nostra vel alterius Ecclesiastici Superioris licentiâ ei non licet) in manibus personæ Ecclesiasticæ id ipsum præster.

14. Et generaliter quæcunque à sacris Canonibus præsertim Concilij Tridentini de vita honestate & modestiâ Clericorum retinendâ & simul de luxu, lusibus & quibuscunque criminibus vitandis sancta sunt, eadem omnia sub ijsdem pœnis tanquam hic repetita hæc Synodus servari mandat.

T I T U L U S I V.

De vitando Concubinatu.

IMmundum & damnabilem concubinatum, quo nihil magis ab honestate Clericorum & Ministeriorum Christi Virginis filij alienum est, Nos hoc decreto nostro execramur, damnamus & profligamus & ad cautelam pro tollenda omni excusatione omnibus notum hisce facimus, Nos nemini hoc in crimine parcituros, sed post hac simpliciter & de plano ad privationem beneficiorum & seriam ac publicam executionem contrâ autores, complices & foedas amasias ubicunq; locorum processuros. Quam rem iterum Vicario nostro in Spiritualibus Generali, & quos ipse pro executione requisierit, seriò injungimus. Concil. Tridentinum sess. 25. c. 14. pœnas concubiniorum accuratius persequens, ea quæ lequuntur, constituit.

Quām turpe ac Clericorum nomine, qui se divino cultui addixerunt, sit indignum, in impudicitiae sordibus immundoque concubinatu versari, satis res ipsa communi fidelium omnium offensione summoque Clericalis militiae dedecore restatur, ut igitur ad eam, quam decet continentiam ac vitæ integratatem ministri Ecclesiae revocentur, populusq; tunc discat, eos magis revereri, quō illos vitâ honestiores cognovit, prohibet sancta Synodus quibuscunq; Clericis, ne concubinas aut alias mulieres de quibus haberi possit suspicio, in domo vel extra detinere, aut cum

Q

cum illis ullam consuetudinem habere audeant, alioquin pœnis à sacris Canonibus vel Statutis Ecclesiarum impositis puniantur. Quod si à Superioribus moniti ab ijs se non abstinerint, tertiam parte fructuum, obventionum ac proventuum beneficiorum suorum quorumcunq; & pensionum ipso facto sint privati, quæ fabricæ Ecclesiæ aut alteri pio loco arbitrio Episcopi applicetur. Si vero in delicto eodem cum eadem vel aliâ scemina perseverantes secundæ monitioni adhuc non paruerint, non tantum fructus omnes ac proventus suorum beneficiorum & pensiones eo ipso amittant, qui prædictis locis applicentur, sed etiam à beneficiorum ipsorum administracione, quoad Ordinarius etiam uti Sedis Apostolicæ delegatus arbitrabitur, suspendantur. Et si ita suspensi eas nihilominus non expellant, aut cum eis etiam versentur, tunc beneficijs, portionibus ac officijs & pensionibus quibuscunq; Ecclesiasticis perpetuò priventur atq; inhabiles & indigni quibuscunq; honoribus, dignitatibus beneficijs ac officijs imposterum reddantur, donec post manifestam vitæ emendationem ab eorum Superioribus cum ijs ex causa visum fuerit dispensandum. Sed si eas semel dimiserint, intermissum consortium repetere, aut alias hujusmodi scandalosas mulieres sibi adjungere ausi fuerint, præter prædictas pœnas Excommunicationis gladio plestantur. Nec quævis appellatio aut exemptio prædictam executionem impedit aut suspendat. Supradictorumque omnium cognitio non ad Archidiaconos nec Decanos aut alios inferiores, sed ad Episcopos ipsos pertinet, qui sine strepitu & figurâ Judicij & solâ facti veritate inspectâ procedere possint. Clerici vero beneficia Ecclesiastica aut pensiones non habentes juxta delicti & contumacia perseverantiam & qualitatem ab ipso Episcopo carceris pœna, suspensione ab Ordine ac inhabilitate ad beneficia obtinenda alijsve modisjuxtâ sacros Canones puniantur.

T I T U L U S V.

De Testamentis et eorum Executione.

I.

Experientia docet quām sit periculosem quantumque detrimenti adferat testamentariam dispositionem ad extremum vitæ terminum differre, quapropter volumus & injungimus omnibus Civitatis & Diœcesis nostræ Pastoribus, Vicepastoribus & Concionatoribus ut iubinde Auditores suos serio moneant, ut ultimæ voluntatis tabulas mature condant atque tempestivè domui, rebus, & bonis suis temporalibus consulant, ne instantे morte ægri & anxii circa mox relinquenda magnis conficiant molestijs non sine periculo scèpè salutis æternæ amittendæ.

2. Hortentur similiter ut testamentum suum extrâ gravioris noxæ conscientiam faciant, totamque dispositionem ad bonum finem dirigant, ne vanitate potius memorie post mortem relinquendæ vel quovis alio sinistro ducti affectu, quām Dei & proximorum amore permoti operis boni merito spolientur.

3. Quod si testamenta condere volentes cum aliquo vel aliquibus publicas habent inimicitias, non solum animitus ignoscant, sed in præsentia aliorum, quod ignoverint, testatum faciant & cum odore virtutis decedant. Quod si alios offendent, expedit ut ad veniam petendam amicos destinent, & pro modo offensæ satisfaciant, reconciliatioque subsequatur. An vero inter præsentes ea sit confienda, prudentis Judicio æstimandum relinquitur, cùm inter præsentes aliquando controversias componi non sit consultum, occultæ inimicitæ secretò quoque dirimantur.

4. Quamvis testatores numerosam habuerint prolem vel consanguineos, meminerint tamen Christum scribere cohæredem, nisi hæreditas fortè sit adeo tenuis ut necessarijs hæredibus seu liberis ad sustentationem honestam necessaria videatur, & legatis minuenda non judicetur.

5. Si Testatoribus nulli fuerint fratres, sorores, alijsve cognati indigentes, liberalioribus legatis ad pias causas animarum suarum salutis optimè consulent, benefaciendo scilicet pupillis, orphanis, viduis, pauperibus, captivis, peregrinis & ægris, præcipue Ecclesijs earumq; ministris penuria laborantibus. Insuper laudabile erit debitoribus vix solvendo existentibus integrum debitum vel partem ejusdem remittere.

6. Idcirco

6. Idcirco quilibet dives Deum timens animæ suæ bene providebit, si aliquam partem substantiæ pijs usibus testamento relinquat, imprimis autem ut Patochiale suam Ecclesiam, si egurit, majorum consuetudine & pietate pro ratione fortunarum suarum pio legato honoret.

7. Confessarij, ut majori Spiritus libertate & fructu animas juvare possint, scriptioni testamentorum non intersint, aut testatori nominatum suadeant, cui aut quibus hereditatem vel legata relinquat, præsertim verò propriarum Ecclesiarum importunum patrocinium non suscipiant, nisi paupertas vel alia necessitas aliud postuleat; Pro consilio requisiti in genere opera pietatis commendent & electionem Testatori omnino liberam relinquant.

8. Meminerint Ecclesiastici, quod singulariter lex charitatis exigat, ut Ecclesiæ & pauperibus benefaciant, proinde in suprema voluntate declarandâ non propinquitate & sanguinis inclinatione moveantur, sed Ecclesiæ Dei utilitatem pauperumq; sublevamen sibi proponant.

9. Considerent etiam periculum suum, si mox ad tribunal Christi rapiendi deque omnibus usque ad extreum quadrantem rationem reddituri facultates sibi creditas ex patrimonio Christi & bonis Ecclesiasticis provenientes maluerint propinquis & consanguineis, quam Christo & ejus Ecclesiæ atque pauperibus relinquere.

10. Venerabili Clero nostro in & extrâ Civitatem nostram Paderbornensem testamenta condere & de rebus etiam beneficiorum absque solemnitatibus à jure civili requisitis validè & licet disponere permittitur, Episcopali quidem Privilegio, inhærendo tamen Canonicis Sanctionibus volumus, ut omnes Ecclesiastici Civitatis & Diœcesis nostræ Paderbornensis testamenta sua in præsentia Notarij vel Pastoris duorumque ad minus testium condant, vel in scriptis voluntatem suam propriâ manu subscriptam, signatam & occlusam Notario vel Pastori coram duobus testibus exhibeant & in charta hujusmodi contineri ultimam suam voluntatem declarant. Notarius verò aut Pastor in dorso chartæ hunc actum scribat & subsignet: Dispositiones aliter factas nullas & invalidas, iegata tamen ad pias causas propriâ testatoris manu scripta vel subscripta sine Notario & testibus subsistere declaramus.

11. Ne Testamenta Ecclesiasticorum casusq; ab intestato diu detineantur & occultentur, interea verò hereditates explicantur, Executores post mortem Ecclesiasticorum testamenta Vicario nostro infrâ triginta & unum dies unâ cum legati inventario exhibeant, approbationem & facultatem exequendi petant, nec non juramentum de fideliter exequendo præstent, anno elapsò accuratam rationem reddituri. Hoc tamen decreto non intendimus statutis aut Privilegiis Cathedralis Capituli nostri de condendis testamentis & executione eorum ullo modo derogare.

12. Quandoquidem omnium ultimarum voluntatum & piarum dispositionum supremi Executores & Tutores sunt Episcopi, per illos vel maximè providendum est, ut Testatorum Ordinationes fideliter executione demandentur, non raro autem accidat, quod tam Clericorum quam Laicorum extremæ voluntates & testamenta, ad pios etiam usus legata & relicta dolosis machinationibus variè impedianter, retardentur, aut in alios usus expendantur. Ideò Vicarius noster sedulò advigilet, accuratamque curam gerat, ut testatorum desiderio & voluntati plenè satisfiat, nec ad pios usus destinata in alios impendantur.

13. Si Clericus quispiam planè intestatus vel sufficienti & legitimo testamento non condito decesserit, ejus hereditas describatur, ex beneficiis Ecclesiasticis provenientia, solutis funeralibus & debitis, ad usus pios in refrigerium animæ defuncti à Nobis præscribendos applicentur, patrimonialia verò hereditibus ab intestato relinquantur.

14. Executorum officium quamvis passim appetatur, grave sane est & molestum, tenentur siquidem Executores non solum ultimam testatorum voluntatem accuratissimè temporibus præscriptis excipi, verum etiam in obligationem eorundem succedentes testamenta, quorum Executores deputati fuerunt, debitæ executioni promptissimè demandare.

15. Justam coquerendi creditoribus præbent occasionem Executores, dum statum & vires hereditatis defuncti ignorantibus, multos minus necessarios sumptus in funeralia profundunt, & sine decreto Judicis proprijs ducti affectibus, quin etiam proprio lucro moti nonnulla debita persolvunt; unde scèpissimè provenit, ut creditores privilegiati tenuioris quandoq; fortunæ defraudentur, gravissimæ huic corruptelæ imò manifestæ iniquitati opportunum adhibere remedium cupientes, omnibus & singulis Testamentorum Executoribus severissimè inhibemus, ne viribus hereditatis non perspectis ullis ad honestam lepulturam omnino non necessarijs expensis eandem

candem minuant neq; antequam legitimū Inventorū confectum fuerit, ex illoq; constiterit, quod hæreditas omnibus debitī solvendis sit sufficiens, vel minutissimā etiam summā in cuiusvis quantumvis privilegiati debiti solutionem absq; Ordinatione Vicarij nostri exponant, contravenientes ad restitucionē factarū non necessariarū expensarū & pecuniaē cuicunque creditori soluta teneri, & ultrā mulētam ijsdem pro qualitate transgressionis infligendam opportunis juris remedij volumus compelli.

6. Cūm non raro inter Executores defunctorum Pastorū & successores lites discordiæq; ratione redditū orientur, pro ijsdem tollendis ordinamus, & statuimus, ut pro ratâ deservitionis de redditib; & obventionib; participant, cūm operatius mercede suâ fraudari non debeat, computabitur itaq; annus fixorum redditū tam frumentariorū quām pecuniariorū à festo Michaëlis usq; ad idem festum anni proximè sequentis, Executores usq; ad diem trigesimum obitūs, proviso interea per qualificatum Pastoratu de consensu nostro pro ratâ temporis proportionabiliter redditib; fruentur, reliquum successori assignabitur.

17. Quoad agros eorumque culturam ordinamus, ut successor omnes impensos sumptus estimatione eorundem per impartiales factâ accuratè solvat, quod si renuat aut non possit, Executores Messe fruentur, successori ratione temporis quo deservivit assignatâ & solutâ parte Canonis, qui præstaretur, si essent elocati agri.

18. Quoad prata, si quæ sint, ordinamus, ut is fœno fruatur, qui à festo SS. Philippi & Jacobi usq; ad finem Julij deservivit, si inter illud tempus quis moriatur, tūm Executoribus, tūm successori pro ratâ fœnum cedet.

T I T U L U S V I.

De Regularibus.

I.

Regulares omnes in Domino hortamur ac monemus, ut secundūm vocationem suam Regulas Sanctorum Patrum dignè ambulent, alijsq; lucis exemplum præbeant; decreta item summorum Pontificum præsertim Bullam GREGORII XV. quæ incipit, Inscrutabili: Diligenter observent, benedictionem & approbationem Concionatorum suorum & Confessariorum petant, & sine illa nullum exponant & decretum INNOCENTII X. quoad approbationem in singulis Diœcesis bus necessariam observent.

2. Claustram Monialium tanquam præcipuum conservandæ integritatis virginalis medium maximopere Concilium Tridentinum ac summi Pontifices ordinarijs locotum etiam sub obtestatione divini Judicij & interminatione maledictionis æternæ commendatam esse volunt. Quocircà salutis nostræ memores cupientesq; à Nobis avertere divinæ ultionis vindictam præcipimus in virtute S. obedientiæ, omnibus Sanctimonialium Monasteriorum Superioribus, Commissarijs ac Visitatoribus, ut in omnibus Monasterijs sibi subjectis clausuram accuratissimè observari current, nec ulla monialis sine nostro in scriptis obtento consensu è clausurâ advisitando cognatos aliave negotia tractanda egredi præsumat.

3. Omnibus ac singulis Sanctimonialibus juxtâ Caput 11. Sess. 25. Concil. Trid. facultatem concedimus, ut annuatim bis vel ter extraordinarijs Confessarijs veluti nostris Missionarijs confiteri valeant, nec ullus Superiorum earundem huic Ordinationi obsistere audeat.

Hæc ad brevem Instructionem universi Cleri sufficient, quæ aliaque in sacris Canonibus sanctisque Scriptoribus latius perlegenda,
qui ea servârint, pax super
illos.

